

Inatsisartut Suleriaasianni § 33, imm. 3, nr. 1 malillugu Nunat Avannarliit Killiit Siunnersuisoqatigiiffiannut Inatsisartut aallartitaasa siulittaasuata aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaata nr. 2/2016-ip Inatsisartunit ilalernerqarnissaanik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu naalackersuisunut kaammattuutigaa inuusuttunut 14-iniit 17-inut ukiulinnut Kalaallit Nunaanni, Savalimmiuni Islandimilu nunat avannarliit killiit efterskoliinik pissusissamisoornerpaamik qanoq pilersitsisoqarsinnaanera allaaseralugu nassuiaasioqqullugit 2018-imi Nunat Avannarliit Killiit Siunnersuisoqatigiiffiannut saqqummiunneqartussamik.

(Aallartitat siulittaasuat Lars-Emil Johansen)

Tunuliaqut:

Nunat Avannarliit Killiit Siunnersuisoqatigiiffiata pingaartippaa atuarfinnik pilersitsisoqarnissaa, inuusuttortatta nunat avannarliit killiit tamanilu innuttaasut qamaniitillugit peroriartornissaannut, kiisalu aamma nunani avannarlerni killerni inuusuttut imminnut inuttut, oqaatsitigut kulturikkullu ilisarisanerulernissaannut peqataasinnaasunik. Taamaattumik pissusissamisuussaaq nunat pingasut pineqartut suleqatigiillutik nammineq kulturiminnik oqaatsiminnillu aallaaveqarnissaat, ilisimasat tamakku atuartunut ingerlateqqinneqarnissaat siunertaralugu.

Innuttaasut akornanni inuiaqatigiit suleqatigiinnermut peqataasut pillugit paasisimasaqarnerulernissaaq ilaatigut siunnersuisoqatigiiffiup anguniagaasa pingaarnit ilaannik siuarsaataassaaq, tassalu Nunat avannarliit killiit soqutigisaasa siuarsarnissaannut suleqatigiinnissaaq.

Nunat Avannarliit Killiit Siunnersuisoqatigiiffiat ilaatigut kommunit naalackersuisullu suleqatigalugit nunanut avannarlernut killernut ullorititanik aqqissuussisarsimapput innuttaasut nunani avannarlerni killerni allani ilisimasaqarnerulernissaat siunertaralugu.

Efterskolinik pilersitsinermi danskit efterskoleqariaasiaat Kalaallit Nunaanni Savalimmiunilu ilisimaneqartoq aallaaviusinnaavoq. Islandimi inuusuttut efterskolertiartinneqartarnerat ileqquunngilaq, kalaallilli atuartut Danmarkimi efterskolersinnaasarnerat ileqquuvoq, aqqissuussinerlu tamanna 1960-ikkunniilli atuussimalluni. Taamatuttaaq Kalaallit Nunaat namminerisamik atuartunut 14-init 17-inut ukiulinnut efterskolinik marlunnik Qasigianguani Maniitsumilu pilersitsisimavoq. Taamaaliornikkut inuusuttut periarfissinneqartarput nutaanik misigisaqarnissaminnut, ilinniarnertuunngorniarnissaminnut ilinniartitaanernulluunniit allanut piareersarnissaminnut imaluunniit angerlarsimaffitsik qimallugu nammineersinnaanermik ilinniarnissaminnut. Tamanna aamma Savalimmiunut atuuppoq, inuusuttut meeqqat

atuarfiannik naammassinnereeraangamik klassilluunniit kingulliit tigujaartorlugit Danmarkimut efterskolertarlutik.

Nunani avannarlerni killerni atuarfeqarfiit aaqqissuussaanut assigiinngilaq. Taamaattumik kaammattuutitut aalajangersagaq manna timitalerneqassappat nunani pingasuni efterskolit ataqatigiissaarneqarnissaat pisariaqassaaq assigiinngissutsit taakku naapertuuttumik isiginiarlutik.